

Aruba

Durante un acto solemne den Parlamento

SRA. YVONNE LACLE A DUNA ACTO DI PRESENCIA COMO GOBERNADOR INTERINO

ORANJESTAD. - Ayera mainta a bin hunto den un reunion solemne di Parlamento, pa cumpli cu stipulacionnan di ley cu ta regarda reglamentonan di Gobernador, articulo 14 inciso 2 cu ta fiha cu e Gobernador interino di pais Aruba mester presenta den un reunion solemne di Parlamento. Cu un transcripcion di e decreto real y e acto di huramentacion cu ta decreta e persona den e cargo di Gobernador interino n'e prome ocasion cu e fungi



como tal. Cumpliando cu e stipulacionnan aki, a keda entrega dor di ayudante di Gobernador na Parlamento y despues cita pa Griffier di Parlamento, e documentonan concerni, caminda Gobernadora interino, sra Yvonne Veronic Lacle-Dirksz ta actua como Gobernador interino.

Sra. Yvonne Lacle-Dirksz ta un persona preciso, involvi y cu ta gusta traha dirigi riba resultado. Un persona cu ta cla pa yuda y

cu por uni otronan. Alabez e ta un persona cu un trayectoria amplio di trabou. Como maestro y docente den enseñanza pa 42 aña el a forma un cantidad di nos hobennan adultonan di awe.

El a yega di fungi como Director di Gabinete di Minister Plenipotenciario na Hulanda. Aki su trabao diario di maneha dicho Gabinete, el a traha cu studiantenan y pacientnan Arubano. Presidente di Parlamento a expresa cu e hecho cu señora Gobernadora ta un ser femenino ta haci'e sinti su mes hopi orguyoso di dje y cu e ta kere esaki ta conta sigur pa tur otro hende muher. Presidente di Parlamento, drs. Mervin Wyatt Ras a gradici e Gobernador interino saliente, señora Ella Alicia Tromp-Yarzaray, pa su dedicacion y contribucion y bon trabou durante 8 aña



cu e tabata Gobernador interino. Den oranan di atardi, tabatin un recepcion n'e cas di Gobernador na

Maria Christianastraat, unda invitado di tur gremio a bay felicita nos Gobernador interino nobo.

